

Amcangyfrifon o'r angen am dai yng Nghymru ar lefel genedlaethol a rhanbarthol (yn seiliedig ar 2018)

Beth yw'r ystadegau hyn?

Mae'r ystadegau hyn yn amcangyfrifon o dai ychwanegol ar lefel Genedlaethol a Rhanbarthol. Caiff yr amcangyfrifon o dai ychwanegol eu cyfrifo gan ddefnyddio amcanestyniadau aelwydydd yn seiliedig ar 2014, yn ogystal ag amcangyfrifon o nifer o elfennau o angen presennol nas diwallwyd. Roedd yr amcangyfrifon blaenorol a luniwyd gan y Sefydliad Polisi Cyhoeddus i Gymru yn seiliedig ar amcanestyniadau aelwydydd yn seiliedig ar 2011 felly maent bellach yn hen.

Dyma'r [Erthygl Ystadegol](#) gyntaf ar yr amcangyfrifon hyn a bydd ail un yn ymddangos yng ngwanwyn 2019 gyda'r amcangyfrifon wedi'u rhannu yn ôl deiliadaeth. Mae'r holl ganlyniadau ar gael ar [StatsCymru](#)

Ni ddylai'r ystadegau hyn gael eu defnyddio fel ffordd o bennu targed tai yng Nghymru.

Cyd-destun Polisi a Gweithredol

Prif ofynion yr amcangyfrifon hyn yw

- Llywio penderfyniadau polisi tai parhaus
- Llywio'r Fframwaith Datblygu Cenedlaethol
- Cefnogi asesiadau o lesiant lleol sy'n ofynnol o dan Ddeddf Llesiant Cenedlaethau'r Dyfodol (Cymru)

Deddf Llesiant Cenedlaethau'r Dyfodol

Mae a wnelo Deddf Llesiant Cenedlaethau'r Dyfodol 2015 â gwella llesiant cymdeithasol, economaidd, amgylcheddol a diwylliannol Cymru. Mae'r Ddeddf yn cyflwyno saith nod llesiant ar gyfer Cymru. Mae'r rhain yn ymwneud â Chymru fwy cyfartal, llewyrchus, cydnerth, iach a chyfrifol ar lefel fyd-eang, gyda chymunedau cydlynus a diwylliant bywiog lle mae'r Gymraeg yn ffynnu. O dan adran (10)(1) o'r Ddeddf, mae'n rhaid i Weinidogion Cymru (a) cyhoeddi dangosyddion ("dangosyddion cenedlaethol") y mae'n rhaid eu cymhwyso er mwyn mesur cynnydd tuag at gyrraedd y nodau llesiant, a (b) gosod copi o'r dangosyddion cenedlaethol gerbron y Cynulliad Cenedlaethol. Cafodd y 46 o ddangosyddion cenedlaethol eu cyflwyno gerbron ym mis Mawrth 2016.

Gellir cael gwybodaeth am y dangosyddion, ynghyd â naratifau ar gyfer pob un o'r nodau llesiant a gwybodaeth dechnegol gysylltiedig yn [adroddiad Llesiant Cymru](#).

Rhagor o wybodaeth am [Ddeddf Llesiant Cenedlaethau'r Dyfodol \(Cymru\) 2015](#).

Defnyddwyr a defnyddiau

Mae'r data yn yr Erthygl Ystadegol hon yn rhan o'r sail dystiolaeth ar gyfer gwaith cynllunio yng Nghymru yn y dyfodol ac fe'u defnyddir gan Lywodraeth Cymru a sefydliadau tai eraill i greu darlun o'r angen cyffredinol am dai ychwanegol yng Nghymru. Caiff y data eu defnyddio i lywio'r Fframwaith Datblygu Cenedlaethol, y gwaith o ddatblygu polisïau yn y dyfodol, yn ogystal â llywio adroddiadau ar Dueddiadau yn y Dyfodol (fel sy'n ofynnol gan Ddeddf Llesiant Cenedlaethau'r Dyfodol (Cymru) 2015)

Caiff y data eu defnyddio i ateb Cwestiynau'r Cynulliad, gohebiaeth weinidogol, achosion Deddf Rhyddid Gwybodaeth ac ymholiadau gan y cyhoedd. Bydd amrywiaeth o ddefnyddwyr yn defnyddio'r ystadegau hyn gan gynnwys llywodraeth genedlaethol a lleol, ymchwilwyr, academyddion a myfyrwyr.

Cryfderau a chyfyngiadau'r data

Cryfderau

- Caiff y wybodaeth ei phrosesu a'i chyhoeddi mewn ffordd drefnus er mwyn galluogi defnyddwyr i weld yr ystadegau pan maent yn gyffredol a mwyaf perthnasol
- Mae'r allbynnau yn canolbwyntio ar Gymru ac maent wedi'u datblygu i ddiwallu anghenion Llywodraeth Cymru a defnyddwyr allanol eraill
- Mae'r amcangyfrifon yn seiliedig ar fethodoleg sefydledig a thryloyw (y cytunwyd arni gyda grŵp technegol) a defnyddir y data swyddogol mwyaf diweddar sydd ar gael ar hyn o bryd
- Darperir amcangyfrifon drwy wefan StatsCymru ar lefel genedlaethol a rhanbarthol

Cyfyngiadau

- Mae'r amcangyfrifon hyn yn seiliedig ar amcanestyniadau aelwydydd yn seiliedig ar 2014. Rhydd amcanestyniadau aelwydydd amcangyfrifon o nifer yr aelwydydd a geir yn y dyfodol, ac maent yn seiliedig ar amcanestyniadau o'r boblogaeth ac amrywiaeth o dybiaethau ynghylch cyfansoddiad a nodweddion aelwydydd. Mae'r tybiaethau yn seiliedig ar dueddiadau blaenorol cymharol ddiweddar ac maent yn dynodi beth allai ddigwydd petai'r tueddiadau hyn yn parhau yn y dyfodol. Bydd amcangyfrifon sydd ymhellach i'r dyfodol yn llai sicr. Nid yw'r amcanestyniadau yn ceisio adlewyrchu effaith polisïau na digwyddiadau fel Brexit.
- Nid yw'r amcangyfrifon cyffredinol yn darged tai. Maent yn dynodi'r angen cyffredinol am dai ychwanegol yng Nghymru, o ystyried y newid a ragamcenir yn nifer yr aelwydydd.
- Mae'r fethodoleg ond yn ystyried aelwydydd sydd angen tai ychwanegol. Felly, nid yw'n ystyried yr aelwydydd hynny sy'n byw mewn llety anaddas ac sydd angen math gwahanol o dai.
- Amcangyfrifir yr angen presennol nas diwallwyd ar sail y data gorau sydd ar gael. Mae hyn yn debygol o dangyfrif y nifer wirioneddol o aelwydydd sydd ag angen presennol nas diwallwyd.

Cylch prosesu data

Data mewnbwn

Mae dwy agwedd ar amcangyfrifon o'r angen am dai: angen newydd ac angen presennol nas diwallwyd.

Mae angen newydd yn seiliedig ar amcangyfrifon o'r angen am dai yn seiliedig ar 2018 yn seiliedig ar [amcanestyniadau aelwydydd yn seiliedig ar 2014](#), a gyhoeddwyd yn 2017.

O dan rai amrywiolion o'r amcanestyniadau aelwydydd, a thua ddiwedd y cyfnod rhagamcan, mae'r amcanestyniadau aelwydydd yn dangos gostyngiad blynyddol yn nifer yr aelwydydd. Mae hyn yn arwain at ffigwr negyddol ar gyfer angen newydd. Felly, nid yw'r gwerth hwn yn berthnasol ac fe'i ystyriwyd fel sero ar y lefel ranbarthol trwy'r erthygl ystadegol a thablau StatsCymru. Mae'r amcangyfrifon o'r angen newydd ar lefel Cymru yn seiliedig ar amcanestyniadau aelwydydd ar lefel Cymru, ac nid ydynt yn cyfateb i swm y rhanbarthau mewn achosion lle nad yw un neu fwy o werthoedd y rhanbarth yn berthnasol.

Mae angen presennol nas diwallwyd yn cynnwys [aelwydydd digartref mewn llety dros dro](#) (ym mis Mehefin 2018) yn ogystal ag [aelwydydd gorlawn a chudd](#) (a ddaw o Gyfrifiad 2011 ac a luniwyd gan SYG mewn tabl wedi'i gomisiynu).

Cyhoeddi

Unwaith y cafodd yr amcangyfrifon eu cyfrifo, lluniwyd y datganiad a chafodd y pwyntiau allweddol a'r sylwebaeth eu drafftio.

Sicrhau ansawdd

Er mwyn sicrhau bod yr amcangyfrifon a'r allbwn o'r gwaith hwn yn gadarn, yn dryloyw ac o'r radd flaenaf, cafodd grŵp Technegol yr Angen a'r Galw am Dai ei sefydlu o'r cychwyn cyntaf sy'n cynnwys arbenigwyr dadansoddol a pholisi o Lywodraeth Cymru a Llywodraeth Leol. Rôl y grŵp hwn oedd cynghori ar fethodoleg a materion technegol.

Hefyd, cafodd y dull a fabwysiadwyd o gyfrifo amcangyfrifon o'r angen a'r galw am dai ei adolygu gan gymheiriaid, a hynny gan y Prif Ddadansoddwyr ac uwch swyddogion eraill yn Llywodraeth Cymru.

Mae'r holl ddata mewnbwn wedi bod yn destun proses sicrhau ansawdd gan ddadansoddwyr yn Llywodraeth Cymru. Mae'r holl ddata allbwn wedi cael eu gwirio yn erbyn ffigurau a gyfrifwyd â llaw.

Cafodd y datganiad ei archwilio'n annibynnol a chafodd gwiriad synnwyr terfynol ei gynnal gan yr ystadegydd perthnasol cyn ei gyhoeddi ar y wefan.

Statws ystadegau swyddogol

Mae'r ystadegau a gaiff eu paratoi yn glynu wrth safonau proffesiynol cydnabyddedig. Cânt eu paratoi yn unol â'r [Cod Ymarfer ar gyfer Ystadegau](#) a hynny'n annibynnol, gyda Phrif Ystadegydd Llywodraeth Cymru yn gyfrifol am y gwaith.

Caiff Ystadegau Swyddogol eu llunio i safonau proffesiynol uchel a nodir yn y Cod Ymarfer ar gyfer Ystadegau. Maent yn destun adolygiadau sicrhau ansawdd rheolaidd er mwyn sicrhau eu bod yn diwallu anghenion cwsmeriaid. Cânt eu llunio heb unrhyw ymyrraeth wleidyddol.

Ansawdd

Mae [adroddiad technegol amcanestyniadau aelwydydd yn seiliedig ar 2014](#) yn cwmpasu diffiniadau a chyfyngiadau allweddol sy'n ymwneud ag amcanestyniadau aelwydydd a'r boblogaeth. Mae'r [adroddiad ansawdd digartrefedd](#) yn trafod gwybodaeth allweddol am ansawdd data ar ddigartrefedd. Mae'r Swyddfa Ystadegau Gwladol (SYG) yn cyhoeddi gwybodaeth am [ansawdd a dulliau Cyfrifiad 2011](#).

Rhoddir rhagor o wybodaeth am ansawdd yn ymwneud ag amcangyfrifon o'r angen am dai isod.

Mae ystadegau tai Cymru yn glynu wrth [Strategaeth Rheoli Ansawdd Ystadegol](#) Llywodraeth Cymru, sy'n unol â chwe dimensiwn ansawdd System Ystadegol Ewrop, a restrir yn Egwyddor 4 o'r Cod Ymarfer ar gyfer Ystadegau Swyddogol.

Rhoddir manylion y chwe dimensiwn, a sut rydym yn glynu wrthynt, isod:

Perthnasedd

Y graddau y mae'r cynnyrch ystadegol yn diwallu anghenion defnyddwyr o ran cwmpas a chynnwys.

Mae'r data yn yr Erthygl Ystadegol yn sail i amcangyfrifon o'r angen am dai yng Nghymru yn y dyfodol ar lefel genedlaethol a rhanbarthol. Cânt eu defnyddio gan Lywodraeth Cymru a Llywodraeth Leol. Caiff yr amcangyfrifon eu defnyddio i lywio'r Fframwaith Datblygu Cenedlaethol, a byddant yn rhoi cyd-destun ar gyfer gwaith datblygu polisi yn y dyfodol, yn ogystal â llywio adroddiadau ar Dueddiadau yn y Dyfodol (fel sy'n ofynnol gan Ddeddf Llesiant Cenedlaethau'r Dyfodol (Cymru) 2015).

Rydym yn adolygu ein hallbwn ac yn croesawu adborth.

Cywirdeb

Yr agosrwydd rhwng canlyniad amcangyfrifon a'r gwerth gwirioneddol (anhysbys).

Yn achos amcangyfrifon o'r angen am dai yn y dyfodol, mae'n anodd mesur pa mor gywir fydd yr amcangyfrifon yn y dyfodol. Caiff pob elfen o'r amcangyfrifon (angen presennol nas diwallwyd ac angen newydd) ei hystyried yn ofalus iawn er mwyn ceisio sicrhau bod y tybiaethau mwyaf priodol yn cael eu gwneud.

Mae elfen o ansicrwydd yn gysylltiedig ag amcangyfrifon o'r angen am dai yn y dyfodol. I ddangos yr ansicrwydd sydd ynghlwm wrth y ffigurau hyn, caiff ystod o amcangyfrifon eu cyflwyno yn yr erthygl hon.

Mae'r amcanestyniadau aelwydydd (elfen allweddol o'r model angen am dai) yn amcangyfrif nifer yr aelwydydd yn y dyfodol a'u maint; ac yn tybio y bydd tueddiadau blaenorol o ran genedigaethau, marwolaethau, a mudo (hynny yw, pobl yn symud i mewn ac allan o ardal) yn parhau. Nid yw amcanestyniadau a gaiff eu llunio fel hyn yn rhoi cyfrif am effeithiau polisiâu llywodraeth ganolog neu llywodraeth leol na dylanwadau allanol ar lefelau poblogaeth yn y dyfodol na chyfansoddiad aelwydydd, na newidiadau yn ffyrdd o fyw'r boblogaeth. Gall newidiadau yn yr economi, mewn ymddygiadau unigol, teuluol ac ar lefel aelwyd, a digwyddiadau y tu allan i'r DU ddylanwadu ar brif elfennau amcanestyniadau aelwydydd.

Cydnabyddwn ei bod yn anodd mesur yr angen presennol am dai ychwanegol nas diwallwyd yn gyson (er enghraifft, nid yw gwybodaeth o restrau aros tai cymdeithasol awdurdodau lleol yn cael ei chofnodi'n gyson ledled y wlad ac ni chaiff y wybodaeth ei choladu'n ganolog).

Ystyriodd y grŵp technegol ffynonellau data posibl a daeth i'r casgliad bod y ffynonellau a ddefnyddiwyd yn gadarn ac yn addas at ddiben y gwaith hwn (er nad oeddent yn gyfredol o reidrwydd). Cydnabyddwn fod y rhain yn darparu darlun anghyflawn o angen presennol nas diwallwyd yng Nghymru a'u bod yn debygol o fod yn dangyfrif.

Mae angen tybiaeth ynghylch sawl blwyddyn y byddai'n eu cymryd i glirio'r angen presennol am dai ychwanegol. Daeth y grŵp technegol i'r casgliad ei bod yn rhesymol tybio y dylai'r angen presennol gael ei glirio o fewn pum mlynedd.

Mae hyn yn golygu tybio y caiff un rhan o bump o'r holl angen presennol nas diwallwyd ei chlirio bob blwyddyn am bum mlynedd. Ar ddiwedd y cyfnod hwn, gellid profi'r dybiaeth hon. Byddai'r ffigurau hyn yn cael eu hadolygu a'u diweddarau ar y cam hwn.

Amseroldeb a phrydlondeb

Mae amseroldeb yn cyfeirio at yr amser rhwng cyhoeddi a'r cyfnod y mae'r data yn cyfeirio ato. Mae prydlondeb yn cyfeirio at yr amser rhwng y dyddiadau cyhoeddi arfaethedig a gwirioneddol.

Mae'r holl allbynnau yn glynu wrth y Cod Ymarfer ar gyfer Ystadegau drwy nodi ymlaen llaw y dyddiad cyhoeddi drwy'r tudalennau [Cyn hir](#) ar wefan Ystadegau ar gyfer Cymru. At hynny, os bydd angen gohirio allbwn byddai hyn yn dilyn trefniadau [Diwygiadau](#), [Camgymeriadau a Gohiriadau](#) Llywodraeth Cymru.

Rydym yn cyhoeddi datganiadau cyn gynted â phosibl ar ôl y cyfnod perthnasol o amser.

Hygyrchedd ac eglurder

Mae hygyrchedd yn golygu pa mor hawdd y gall defnyddwyr gael gafael ar y data, ac mae hefyd yn golygu fformat(au) y data a ph'un a oes gwybodaeth ategol ar gael. Mae eglurder yn cyfeirio at ansawdd a digonolrwydd y metadata, darluniadau a chynghor cysylltiedig.

Caiff amcangyfrifon o'r angen yng Nghymru yn y dyfodol eu cyhoeddi mewn ffordd hygyrch a threfnus, a nodir ymlaen llaw, ar wefan Llywodraeth Cymru am 9.30am ar y diwrnod cyhoeddi.

Mae ffrwd RSS yn hysbysu defnyddwyr cofrestredig o'r cyhoeddiad hwn ac mae trydariat o [@ystadegaucymru](#) yn hysbysu defnyddwyr Twitter am ei ryddhau. Caiff y datganiadau eu cyhoeddi ar GOV.UK hefyd ar yr un pryd.

Anelwn at hysbysu defnyddwyr allweddol hysbys am gyhoeddi'r ystadegau pan gânt eu cyhoeddi. Anfonir e-bost at y [Grŵp Gwybodaeth Tai](#).

Mae pob datganiad ar gael i'w lawrlwytho am ddim. Mae data manylach hefyd ar gael ar yr un pryd ar wefan StatsCymru a gellir eu trin ar-lein neu eu lawrlwytho i daenlenni i'w defnyddio all-lein.

Yn ein hallbynnau, anelwn at sicrhau cydbwysedd o ran sylwebaeth, tablau cryno, siartiau a mapiau lle bo'n berthnasol. Y nod yw 'adrodd yr hanes' yn yr allbwn, heb i'r bwletin na'r adroddiad fod yn rhy hir.

Anelwn at ddefnyddio iaith glir yn ein hallbynnau ac mae pob allbwn yn dilyn polisi hygyrchedd Llywodraeth Cymru. Caiff yr erthygl ei chyhoeddi'n ddwyieithog.

Rydym yn cynnal adolygiad cymheiriaid o'n hallbynnau'n fewnol.

Gellir cael rhagor o wybodaeth am yr ystadegau drwy gysylltu â'r staff perthnasol a nodir ar y datganiad neu drwy ystadegau.tai@llyw.cymru

Cymharedd

Y graddau y gellir cymharu data dros amser a pharth.

Mae'r amcangyfrifon hyn yn cymryd lle'r [amcangyfrifon blaenorol o'r angen a'r galw am dai yng Nghymru yn y dyfodol](#) a gynhyrchwyd gan Alan Holmans ac a gyhoeddwyd gan y Sefydliad Polisi Cyhoeddus i Gymru yn 2015. Defnyddiodd yr amcangyfrifon a gyhoeddwyd gan y Sefydliad amcanestyniadau aelwydydd yn seiliedig ar 2011.

Nid oedd yr amcangyfrifon blaenorol hyn yn cynnwys amcangyfrif o angen presennol nas diwallwyd. Er y nodwyd bod hyn yn agwedd bwysig ar yr angen am dai ychwanegol, ni chafodd ei gynnwys yn y cyfrifiad cyffredinol terfynol. Nid yw'r ffordd y cafodd amcangyfrifon Holmans eu cyflwyno yn ei gwneud yn bosibl i'w cymharu'n uniongyrchol â'r amcangyfrifon newydd sydd fesul cyfnod o bum mlynedd.

Mae rhagor o wybodaeth ar gael yn adran 2.5 o'r erthygl ystadegol.

Cydlyniaeth

Y graddau y mae data sy'n deillio o ffynonellau neu ddulliau gwahanol, ond sy'n cyfeirio at yr un ffenomenon, yn debyg

Lloegr

Mae'r [canllawiau cyfredol ar asesu'r angen am dai yn Lloegr](#) wedi'u diweddarau yn unol â'r Fframwaith Polisi Cynllunio Cenedlaethol newydd a gyhoeddwyd ym mis Gorffennaf 2018.

Gwnaeth y Gweinidog Tai Cymunedau a Llywodraeth Leol [lansio ymgynghoriad yn ddiweddar](#) yn ceisio barn am newidiadau i ganllawiau arfer cynllunio yn ymwneud â'r dull safonol o asesu'r angen lleol am dai ac egluro polisïau'n ymwneud â chyflenwi tir ar gyfer tai, y diffiniad o bethau i'w cyflawni ac asesiad priodol.

Yr Alban

Yn yr Alban, ni chaiff amcangyfrifon swyddogol o'r angen a'r galw am dai eu cyhoeddi ar lefel genedlaethol na lleol. Fodd bynnag, amlinellir amcangyfrifon o nifer y tai ychwanegol yn y dyfodol, yn ôl deiliadaeth, er mwyn diwallu'r angen am dai a bodloni'r galw am dai nawr ac yn y dyfodol mewn Asesiadau o'r Angen a'r Galw am Dai. Cyflawnir hyn gan awdurdodau lleol yn yr Alban fel yr awdurdod tai a chynllunio strategol ac fe'u cefnogir yn ganolog gan Ganolfan Llywodraeth yr Alban ar gyfer Dadansoddi'r Farchnad Dai. Cafodd adnodd HNDA ar ffurf Excel ei greu gan Lywodraeth yr Alban er mwyn helpu awdurdodau lleol i lunio'r amcangyfrifon strategol, tymor hir hyn.

Fodd bynnag, mae'r adnodd HNDA hefyd yn nodi gwybodaeth am weithredu'r system dai er mwyn helpu awdurdodau lleol i ddatblygu polisïau ar gyflenwi tai newydd, rheoli stoc bresennol a darparu gwasanaethau sy'n gysylltiedig â thai a thai arbenigol. Diben yr HNDA yw darparu sail dystiolaeth

gadarn a rennir ac y cytunir ami ar gyfer polisi tai a chynllunio defnydd tir a sicrhau bod Strategaethau Tai Lleol a Chynlluniau Datblygu yn seiliedig ar ddealltwriaeth gyffredin o ofynion tai nawr ac yn y dyfodol.

Mae'r CHMA yn arfarnu pob HNDA yn ffurfiol a lle mae'n fodlon bod yr HNDA yn gadarn ac yn gredadwy, bydd y dull a ddefnyddir fel arfer yn cael ei ystyried ymhellach mewn archwiliad o'r Cynllun Datblygu.

Gogledd Iwerddon

Rhydd Dangosyddion o Dwf Tai amcangyfrif o'r angen am dai yn y dyfodol yng Ngogledd Iwerddon. Mae'r ffigurau yn defnyddio amcanestyniadau aelwydydd a lunnir gan Asiantaeth Ystadegau ac Ymchwil Gogledd Iwerddon (NISRA) fel sail. Felly, mae'r ffigurau yn seiliedig ar dueddiadau llunio poblogaeth/aelwydydd presennol gan dybio y bydd y tueddiadau hyn yn parhau yn y dyfodol. Felly, dylent gael eu defnyddio fel arweiniad yn hytrach na chael eu gweld fel cap ar ddatblygu tai yn yr ardal neu darged i'w gyflawni.

Cafodd Dangosyddion o Dwf Tai eu cyhoeddi'n flaenorol yn Strategaeth Datblygu Rhanbarthol 2035 ym mis Mawrth 2012 ar gyfer y cyfnod 2008-2025. Roedd yr amcanestyniadau aelwydydd a ddefnyddiwyd ar gyfer y dangosyddion hyn yn seiliedig ar ddata 2008. Mae'r [dangosyddion diweddaraf](#) yn defnyddio [amcanestyniadau aelwydydd yn seiliedig ar 2012](#) ac felly byddant wedi'u cyfrifo ar gyfer y cyfnod 2012-2025. Mae'r dangosyddion wedi'u cyfrifo ar gyfer Gogledd Iwerddon a hefyd ar gyfer pob un o'r 11 o Ranbarthau Llywodraeth Leol.

Adeiladu Tai Newydd

Mae'r datganiad ystadegol ar [Adeiladu Tai Newydd yng Nghymru](#) yn cwmpasu nifer yr anheddau newydd a ddechreuwyd, lle mae'r gwaith adeiladu wedi dechrau a'r rhai a gwblhawyd. Mae data ar gael ar lefel awdurdod lleol, yn ôl y math o annedd (tŷ neu fflat) a nifer yr ystafelloedd gwely

Gwerthuso

Rydym bob amser yn croesawu adborth ar ein hystadegau. Cysylltwch â ni drwy e-bost: ystadegau.tai@llyw.cymru

Dolenni Defnyddiol

Llywodraeth Cymru

- [Datganiad Ystadegol Amcanestyniadau Aelwydydd yn seiliedig ar 2014](#)
- [Amcangyfrifon o'r Stoc Anheddau](#)
- [Digartrefedd](#)
- [Darpariaeth Tai Fforddiadwy](#)
- [Adeiladu Tai Newydd](#)

Arall

- [Amcangyfrifon PPIW o'r Angen a'r Galw am Dai yn y Dyfodol yng Nghymru](#)

Cynhyrchwyd gan y Gwasanaethau Gwybodaeth a Dadansoddi, Llywodraeth Cymru

Diweddariad diwethaf: Ionawr 2019